

Govor predsjedavajućeg Komisije za vanjsku trgovinu i carine Predstavničkog doma Parlamentarne skupštine BiH Šemsudina Mehmedovića na Interparlamentarnoj konferenciji: „Ekonomsko upravljanje i stvaranje radnih mjesta u EU i zemljama proširenja“

Sarajevo, 15. oktobar 2015.

Uvažene ekscelencije,
Drage kolegice i kolege,
Dame i gospodo!

Izuzetna mi je čast i zadovoljstvo da vas, u ime Parlamentarne skupštine BiH i u svoje ime, pozdravim i zaželim dobrodošlicu u našu zemlju.

Nadam se da će današnja konferencija biti forum dijaloga i razumijevanja. Uvjeren sam da razmjenom mišljenja i ideja možemo doprinijeti bržem rješavanju ekonomskih problema, intenzivirati saradnju među zemljama regiona i pružiti podršku zemljama članicama koje su u procesu približavanja Evropskoj uniji.

Dame i gospodo,

Bosna i Hercegovina je snažno opredijeljena ka euro-atlanskim integracijama, temeljeći svoj pravni system na pravnoj stečevini Europe i demokratskih zemalja, kao i regionalnoj saradnji. Značaj regionalne saradnje prepoznajemo kao osnovni preduslov za ravnopravno partnerstvo, naprije sa susjedima, a potom i sa ostalim državama u Evropi. Doprinoseći stabilnosti i sigurnosti u regionu, stičemo preporuku za napredak na evropskom putu. U tom smislu želim da istaknem značaj podrške Evropskog parlamenta u procesu proširenja EU.

Međusobno povezivanje država regiona ključno je za dugoročnu bezbjednost i prosperitet Zapadnog Balkana. Među najvažnijim aspektima je ekonomski razvoj. kao jedan od temeljnih stubova demokratskog društva, jer ako čovjek nije ekonomski neovisan, upitna je njegova sloboda. Zemlje u procesu pridruživanja Evropskoj uniji uz rješavanje pitanja naslijeđenih iz prošlosti treba da unaprijede međusobnu saradnju i poboljšaju uslove života građana.

Govoreći o upućenosti susjeda u regionu jednih na druge, imamo u vidu relativnu nerazvijenost privreda i ograničenog korištenja resursa, ograničenih nacionalnih tržišta, nivo ekonomske snage i relativno nizak nivo infrastrukturne razvijenosti.

Zato smatram da ključ dostizanja pozitivnih rezultata leži upravo u izgradnji regionalne saradnje i povezanosti, ali i poboljšanju ekonomske situacije u svakoj zemlji, otvaranju radnih mjesta i prosperitetu društva...to je put ka izgradnji demokratskog društva.

Očekujemo da će region zapadnog Balkana biti infrastrukturno i energetska povezan u narednim godinama, kako bi se podstakao oporavak i ojačala ekonomska saradnja te izgradilo što otvorenije tržište za ulaganja. Evropska unija najavila je milijardu eura iz prepristupnih fondova za saobraćajnu infrastrukturu.

Naš cilj je da se sva sredstva i energija usmjere na razvojne programe i projekte kojima će se povećati zaposlenost i bruto društveni proizvod, kako bismo ostvarili veći trgovinski promet regiona, a smanjili naš spoljnotrgovinski deficit, otvaranjem radnih mjesta povećanjem stope zaposlenosti, povećanje broja visokoobrazovanih u radnoj snazi.

Dosadašnja praksa pokazala je da se nije dovoljno saradivalo na zajedničkim projektima te da je trgovina glavni oblik saradnje, a da su u manjoj mjeri to investicije. Ponuda radne snage u regionu veća je od potražnje, dok je struktura nepovoljna. S obzirom na to da ova oblast zahtijeva i međusobno usaglašavanje zakonodavstva u zemljama Zapadnog Balkana, potrebno je ukazati na nedostatak bilateralnih sporazuma o slobodnom kretanju radnika, usklađivanje sistema obrazovanja s tržištem rada kao i regionalno planiranje kretanja radnika.

Dame i gospodo,

Nedostatak radnih mjesta jedan je od ključnih razloga za zabrinutost radno sposobnih građana Bosne i Hercegovine. BiH zaostaje za susjednim zemljama u političkoj i ekonomskoj napretku i stabilnosti, što je uticalo da strani investitori ulažu u susjedne zemlje koje imaju bolju perspektivu za pristup Evropskoj uniji i konkurentnije poslovno okruženje. Za posljedicu, nivo stranih ulaganja po stanovniku u BiH je među najnižim u regionu.

Neophodno je da BiH efikasnije koristi potencijalne izvore ekonomskog rasta, poveća produktivnost privatnih preduzeća i značajno unaprijedi poslovno okruženje kako bi privukla investicije. Stopa nezaposlenosti kreće se od 24% do 44% i posebno je visoka među mladima.

Na lokalnom nivou, ekonomski rast narušen je brojnim faktorima, uključujući nedostatak inovativnih, poslovno orijentiranih lokalnih strategija razvoja, kojima bi se otvorila nova radna mjesta i privukle investicije. Čak i nakon osmišljavanja strategije za ekonomski razvoj, mali broj općina privukao je značajne investicije i otvorio radna mjesta kao rezultat tih investicija. Ja upravo dolazim iz jedne sredine koja je od potpuno nerazvijene sredine u EX YU, zadnjih godina postala PRIMJER DOBRE PRAKSE, u ovom sivilu. Znači može se ...potreban je rad.

Dame i gospodo,

Smatram da je potrebno stvoriti bolje poslovno okruženje, političke prilike i bolje tržište kako bi zemlje regiona mogle zajednički da nastupaju i na trećim tržištima.

Niz sastanaka predstavnika zemalja Zapadnog Balkana koji su pokazali pozitivnu tendenciju i spremnost na međusobnu saradnju, ne samo s ciljem razvoja infrastrukturnih projekata iz oblasti transporta i energetske infrastrukture, nego i radi dobre saradnje regije Zapadnog Balkana, predstavljaju dobru osnovu za ekonomski i društveni razvoj. Zemlje regiona moraju zajedno raditi na projektima koje će predstaviti Evropskoj uniji i za njih tražiti finansijsku podršku. Ali na projektima koji su o svojoj suštini projekti masovnog zapošljavanja i stvaranja novih vrijednosti, a ne potrošački koji dodatno opterećuju ekonomske parametre kako individualno tako i u općem smislu.

Kada je u pitanju pridruživanje EU, ono što je jasno za svaku od naših zemalja jeste da ne možemo savladati taj proces ako ne unaprijedimo nivo ekonomskog razvoja. ali bi bila poželjna saradnja i međusobna pomoć i razumijevanje zemalja u region, kako bi zajednički imali stabilnost i prosperitet, ali i evropsku perspektivu. Imajući u vidu da je zakonodavna vlast sve uključeniya u proces evropskih integracija, saradnja na regionalnom nivou posebno je značajna zbog međusobne razmjene informacija i iskustava u suočavanju sa zajedničkim izazovima.

Želim izraziti nadu da će i ovakav skup pomoći BiH na putu evropskih integracija, tako što će ponovo približiti evropsku perspektivu Bosne i Hercegovine svim nivoima vlasti u našoj zemlji. Ovo će biti prilika da razgovaramo o značajnim ekonomskim i socijalnim reformama i prilagođavanju standardima Evropske unije. Istovremeno, koristim ovu priliku da vam zaželim uspješan rad i dobrodošlicu u Bosnu i Hercegovinu. HVALA!